

Qui sapit, ille animum fortunæ præparat omni.  
Præuisumq; potest arte leuare malum.

Hæc ærumnosa hominum natura præmitur ingentibus miserijs multo pluribus, quàm quas astra denunciant. Non igitur quæramus philosophiam humanam, quæ depellat omnia pericula & mala, sicut nec mors tolli medicatione potest, imò nec morbi omnes pelli possunt. Agnoscamus nos esse massam peccati, ac propter iram Dei singulos & poenas priorum lapsuum ferre, & publicarum miseriarum societate feriri. Et tamen cum accedit agnitio uera filij Dei, Domini nostri Iesu Christi, experientur se præsidia uitæ maiora habere, quàm si Cræsi opes, arces, & exercitus haberent.

Nec omnino uerum est Pindari dictum, qui Phisicos ait *ἀείπειν ἀτιμὰ καὶ κερπύροσφίαις*. Non semper opitulantur artes. Imò multa sunt in multis artibus, nondum satis patefacta. Fruendum est tamen ea doctrina, quam Deus & conspici, & adminiculum aliquod uitæ esse uoluit.

Cum igitur hæc diuinatrix sit Physica quædam temperamentorum & inclinationum humanarum aspectio, & causarum cœlestium collatio, ex uera experientia extructa, ars est & concessa, & qua bonæ mentes benè uti possunt, ut medicis prædictionibus. Ideo utile est reliquias ueterum scriptorum in hoc genere seruari. Ac mihi clarissimus uir Ioannes Schonerus, quem ego penè solum hac nostra ætate artificem in hoc genere esse, uerè confirmare possum, utilissimam operam præstitisse uideatur, quòd & ab alijs tradita, & à se longo usu obseruata in unum corpus coëgit, & tanquam dissipatas ædificij partes bellissime extruxit, ut tota ars sine magno negotio à studiosis perdisci possit. Etsi enim, ut solet, alia præcepta alijs sunt firmiora, tamen prudentes delectum adhibere poterunt. Nec sua laude ideo Schonerus priuari debet, qui insigni hoc suo labore id egit, ne ars tota, & magna pars ueræ physices interiret. Hæc igitur bonis, studiosis, amantibus philosophiæ, & uniuersæ doctrinæ de motibus & effectibus cœlestibus eduntur. Hi legant, & sese ad amorem omnium bonarum artium, & ad cogitationem de diuersis causis actionum humanarum, & de tota gubernatione uitæ exuscitent, & naturæ infirmitatem contemplantes, confugiant ad Deum æternum patrem Domini nostri Iesu Christi, & huius mediatoris fiducia petant, ut diuinitus regamur, & defendamur.